

賀先生文集

賀先生文集敘

賀先生文集四卷武強賀松坡刑部濤所作也自桐城姚姬傳氏  
推本其鄉先生方氏劉氏之微言緒論以古文辭之學號召天下  
湘鄉曾文正公廓而大之曾公之後武昌張廉卿桐城吳肇甫兩  
先生最爲天下老師繼二先生而起者則刑部君也蓋桐城諸老  
氣清體潔義法謹嚴篤守先正之遺緒遵而勿失於異學爭鳴之  
時釐然獨得其正此其長也曾公私淑桐城之義法而恢之以漢  
賦之氣體闡肆雄放光燄熊熊遂非桐城宗派所能限張先生孺  
古至深吳先生復參以當時之世變匡濟之偉略堂奧崇隆視前  
人超絕矣兩先生門下賢雋士相通流如通州張謇季直范當世  
肯堂滄州張以南化臣桐城馬其昶通伯姚永概叔節南宮李剛  
已剛己冀州趙衡湘颿皆其著者也刑部受知吳先生獨早先生

矜寵異甚復爲通之於張先生以故兼受兩家學於吳先生門尤爲耆宿趙李之徒皆其後輩而君掣精典籍若蠲生命沈潛專到突過時流其文章導源盛漢汜濫周秦諸子唐以後不屑也其規撫藩域一仿曾張吳三公宏偉幾與相埒而矜練生勗意境自成不蹈襲前輩蹊徑獨樹一宗不爲三先生所掩蓋繼吳先生後卓然爲一大家非餘人所能及也自方姚以來訖於君其淵源本末可得而言者具如此而有清一代文章沿革之大概亦略備於是矣君中年後病目未幾遂盲既盲二十年誦講不輟所爲文益多且精集中後二卷之文大抵病目後之所爲也此尤前古所鮮聞者蓋其冥探默索之功勤矣往君教人喜論張吳兩先生之文以爲相去痾近則感發倍切而窺見源流攀緣亦較易以君之言求君之學則君文之行世可不重與世昌辱與君同年相交最篤以

久君既逝世文集未出恐久且藹落乃以貲屬君子葆真與君門  
人吳闔生校定稿本而刊行之并識其緣起如此中華民國三年  
二月天津徐世昌敘

賀先生文集序

絕大河而北太行左轉極東薄海乃自古燕趙之地至元明建都朔方南面以控制天下近代因之四方冠蓋輻湊並會而至風俗所漸山川旁魄蘊積而發其豪者爲近時之武功而精焉不可磨之英華乃特發之爲文而先生生實當其地自昌黎韓子叛爲古文述往開後統一斯文之體後之作者舉不能外所爲傳衍曲折終歸之先生昔荀卿子揭先王立人之道標禮以傳示後學歷魏晉六朝訖于唐幾且千年斯文之體蓋屢變韓子承其後旣叛爲古文之體起八代之衰而其自述爲文之要曰扶樹道教有所明自自韓子至先生又八代且千有餘年矣涵濡醞釀於郊甸之中歷千餘年之久而山川始煥然復發其光華有清二百五十六年天下之文章在桐城吳先生承其鄉先正方姚諸先生之傳益從

曾文正公拓而大之基宇崇隆盡籠有今古中外美富落其實而取其材譬之於時黻斂成熟之候也客遊來北悉以付之先生吳先生既沒先生最爲海內老師其爲文帖如調矯龍生虎爲牛馬辨如屈長江大河在堂坳倚如立身九天之上俛視下界穰穰聚歸其道一本荀子語若異意則同其體一放韓子兒相萬神唯一門人冀州趙衡謹序

賀先生文集目錄

武強賀濤松坡著

天津徐世昌鞠仁編

卷一

誥封資政大夫泗州直隸州知州裴公墓志銘

光緒壬午

上吳先生書

送裴叔和入都序

答高搏九太守書

代 癸未

重修故城馬公祠記

代

楊剛介公家傳

甲申

湯母方太孺人六十壽序

代

叔父鐵君先生事略

交河李君墓表

大名書院增膏火記

乙酉

書柳子宋清傳後

讀墨子

送張京卿使外國序

賀母齊太孺人九十三壽序

代

沈越生傳

開州重修披雲樓記

李起韓先生七十八壽序

丙戌

送勞厚菴先生序

廣西布政使范公家傳

孔繡山先生文集序

丁亥

戴母吳太宜人八十壽序



王榕泉先生墓表

書大名國太守事

李亞之先生墓表

李君恕堂墓表

題大橋遺照

周孺人傳

祭王次陶文

戊子

書商君傳後

武強蔡君墓表

答宗端甫書

書韓退之答劉秀才論史書後

送范肯堂序

讀柳子厚集

送張先生序

送吳先生序

己丑

題畢芾亭先生小像

定州王文泉先生行狀

卷二

婺源潘竹銘墓表

庚寅

書史記游俠傳後

書天津金氏三烈婦詩後

藏園記

山西絳州直隸州知州陳君墓志銘

書三國志蜀志後

太子少保刑部尙書嵩公五十壽序

讀韓子

裘翼菴傳

讀漢書公孫賀傳

楚禽堂制義序

辛卯

書所鈔儀禮後

送王梅岑視學山西序

送陳雨民序

書范肯堂書日本高松保郎上使臣書後後

雜說二首

魏母賀太恭人壽序

代

書常乃亭齋壁

武昌張先生七十壽序

王辰

上張先生書

書旌表烈婦李恭人事狀後

書雷壽母傳後

冀州開渠記

李氏妹哀詞

徐母劉太宜人六十壽序

戴鏡源先生墓表

代 癸巳

嚴烈女墓表

論左傳

復吳先生書

冀州直隸州知州牛君壽序

授經堂記

于君吉菴墓志銘

劉君範堂墓表

宗蓉舫先生墓志銘

書泰山墮淚圖記後

硯銘

爲蔣藝圃作

陳母李太恭人壽序

題西山精舍圖

張搢軒先生七十壽序

北江舊廬記

甲午

送宋芸子序

張君又新墓表

代

書文章類選卷首

謫國語

書故城沈氏孫氏先世事

祭張廉卿先生文

題愍孝錄

王小泉先生行狀

陳尊齋先生八十壽序

卷三

宗錫廬墓表

乙未

丁箴若先生壽序

厯亭吟藁序

送陳蓉曙序

書所鈔晉書天文志後

送湖南巡撫陳公序

朱君步齋墓志銘

丙申

華母姜太恭人八十壽序

武强天平溝記

徐君少珊墓志銘

丁酉

送王晉卿序

謝太夫人墓志銘

戊戌

賀立羣先生墓表

小萬柳堂圖記

蘿村先生墓表

深州義倉記

劉太淑人墓表

己亥

宗君華甫六十壽序

吳先生六十壽序

補寧郭君墓表

國執

庚子

上吳先生書

壬寅

復吳辟疆書

劉太夫人墓志銘

吳宜人傳

宗氏婦傳

魏堂先生八十三壽序

書說易說序

癸卯



吳先生行狀

吳先生墓表

慶陽府知府步公墓表

冀州直隸州知州保山吳公五十壽序

宗君華甫墓志銘

黃西纏先生七十壽序

王重璽先生墓表

謝倬峯墓表

甲辰

吳熙甫先生墓表

書吳辟疆送籍亮儕之日本序後

東鹿謝君墓表

乙巳

黃小宋觀察益壯圖記

代

法政學堂記

書吳虞卿軍門壽詩後

代

送安徽按察使陳公序

送吳辟疆序

題陳少室先生印存

卷四

尙君采章六十五壽序

丙午

書天津徐氏族譜後

跋紀文達公詩草卷子

代

題江樓送別圖

題御製十臣贊冊

劉太恭人八十壽序

陳文恭公手札節要序

代

華母姜太恭人九十壽序

華母姜太恭人九十壽序

楊耀庭先生七十壽序

書秦園詩鈔後

烈婦瓜爾佳氏墓表

宗氏烈婦傳

陳尊齋先生墓表

丁未

杜潤生先生墓表

送徐尙書序

左文襄公年譜書後

上徐制軍書

題文學館藏書記卷首

誥封榮祿大夫吳公墓志銘

寶慶府知府饒陽常公墓表

復徐制軍書

題行年七影圖

古文四象序

戊申

歐太淑人墓志銘

外務部尙書袁公五十壽序

代

外務部尙書袁公五十壽序

代

兵部郎中永年武君墓志銘

馬太恭人墓表

宣統己酉

上徐尙書書

吳先生點勘史記序

旌表節孝王母賀太孺人墓表

饒陽常君墓表

古餘薌閣詩序

南皮張君傳

賈星垣先生墓志銘

吏部侍郎張公傳

代

孟宜堂先生墓表

庚戌

饒陽劉君墓表

王普齋先生墓表

辛亥

王氏妹七十壽序

代

王母賀太恭人七十壽序

代

墨羊張廉卿評吳錄筆吳勢系評去

門人任邱宗樹柑錫宗俊貞校  
桐城吳閻生男葆真校

字野白酌

今執公

列主恩第

退之造句

格已近似

所不逮者

氣之雄古耳

# 賀先生文集卷一

錄明清八大家文抄評卷

誥封資政大夫署鳳陽府知府泗州直隸州知州裘公墓志銘

公諱寶善字華南河間裘氏曾王父庚王父棠妣氏劉父士燿妣

氏孔本生父士煥妣氏郝封贈皆如公官王父以公子官累贈中

憲大夫妣皆恭人父資政大夫妣夫人公生而英特有膽略所當

爲不避勞怨道光壬辰舉於鄉官安徽是時吏治弛廢盜賊充斥

皖俗尤雕悍不易治巨蠹大猾任俠作姦不扇而動其大羣乃至

千百爲輩有司避法匿不以聞公曰豪猾不治亂萌也余其敢避

初任貴池縣知縣山民扇亂單騎往撫操兵羣譁叱之退明日復

往接以溫語眾乃大歡振其脅從而寘法其魁姚紹孔者懷遠巨

匪也橫行潁鳳壽毫間欲有爲召號數萬人立致公由貴池調懷

遠卒往掩捕立禽以歸合肥姦民屢拜文罔官不敢誰何大吏調

公往治不旬日盡得其渠率人驚爲神公所至必先徵集吏役選任其豪購民之勇悍者爲耳目或計招賊黨誘厲之惟我使所任用捕不力重懲之獲賞亦不貲所捕卽豪橫必親往以身先卽危不少避以故所欲捕無不獲姦宄聳畏相戒不敢犯薦卓異以直隸州升用署壽州未幾補泗州咸豐三年粵賊自湖北趨安徽安慶不守移行省於廬州又不守團練大臣呂文節公巡撫江忠烈公相踵殉難遠近震駭賊迹所至望風瓦解公旣任吏民以捕盜盡識其才鄙怯勇指授方略誓與死守城賴以完調署鳳陽府泗復告警巡撫福濟公素重公以爲非公莫任是也復檄還泗公至設施如初賊知有備乃遁去而州之亂民潛與賊通賊旣去乘機竊發所在羣起公窮勦力捕卒壹廓清公旣以捕盜著稱聲播遐邇及兵事起疆吏爭欲致公民人苦盜賊公旣有以措之安無不



喁喁企慕望公之來恐其復去其在泗州也廣西巡撫周文忠公馳疏調公赴粵至則文忠已去而大學士賽尙阿公督師故聞公名欲留公而安徽巡撫以皖中事棘復檄公歸及在鳳陽泗州民爭諸大府鳳陽人亦往爭之公不相下及回守泗事乃解福公嘗謂同官曰時事日壞裘君軍旅才可重寄也及再守泗州且特疏薦公而公以太夫人春秋高力請終養乃解官歸以子官封資政大夫娶周氏繼娶王氏先卒皆贈夫人子德容早逝德倭由刑部郎中官御史敢言以道員留江蘇補用賞二品頂戴孫祖誥候選知府祖詒廩生祖誠舉人祖諤副榜祖詔家居二十年同治十二年九月二十二日卒春秋七十有六公子觀察君爲濤姑壻將以光緒九年十月二十日合葬公兩夫人之壙濤爲之銘銘曰  
寇亂始作光豐之閒洞庭而東鼙鼓戈鋌初乃烏合遂至燎原孰

尸其咎吏不督奸矯矯裘公力殫大憝作宰江淮羣兇狂獠牙鋸  
爪鉤攫拏搏噬不一爬梳民乃瘡疥公奮而起往礪其梟絕其孽  
芽禽獮莠薶禍亂之積匪一夕朝大憝既去患乃潛消今久太平  
閭閻接堵禍所伏積或不聞覩譬物有孽鳥天蟲蠱一朝橫發疊  
其可禦公則往矣誰可與語

上吳先生書

前侍坐時言及先叔父學行許作碑誌以光寵之感激無似濤嘗  
以謂人苟不至自甘泯滅與眾人伍而志學可稱則無論遇之  
豐嗇業之成否無不營營若有求皇皇若有失時平以憂時平以  
喜若此者何哉亟欲見知於人恐其死而已耳叔孫豹所稱三不  
朽力能自傳者也下此則不能自傳而必有藉於人以傳太史公  
曰閭巷之人欲砥行立名者非附青雲之士惡能施於後世濤妄

反復盡意  
取于周上歐公  
書尤暢詞婉  
而旨深矣時  
自露襟抱  
措施之非  
人耳侯所撰  
行狀成當勉  
竭端而引到  
感懷

以謂此自明著述之意耳孔子以前仁聖賢人待孔子而彰其後者將待我而顯故曰孔子卒後五百歲小子何敢讓焉今觀其書抱一經以爲儒任氣以爲俠親卑汙以爲賤業苟有所執以成其名無不掇而登之豈獨廣異聞哉彼旣翹然負異於眾類皆有過人之才獨至之學惡得聽其昧沒使與庸鄙委瑣之徒同食息死生於天地而不爲之區別也東漢以後碑誌之文興作者代有退之永叔介甫尤喜爲之所與遊處悉著於篇而於負奇抱異蹇蹇於時者言之尤痛夫志欲有爲於時不得而困頓以死旣死而名又將泯焉誠足悲矣然不遇命也死而不能傳亦命也命之所厄人無如何而仁人君子乃取幽抑之魂悲懣懣恨而無可告語者爲之激揚而發舒之此固死者所稱快於九原而奇特之士讀之而流涕者也曾子固謂誌銘近史濤謂遷史後史皆修於異代搜

輯爲難當時國史又拘於品位不能濫載銘誌則戚故朋好皆得稱述故義與史近而發幽章微之功則過之國朝史館體例尤嚴非賜諡不立傳非官一品及死事又不得賜諡乾隆之末創立儒林一門碩學經師燦列簡冊例稍寬矣而瑰材偉抱不以著述見者終不得幸廁其閒先叔父有志斯世困不得施居恆抑鬱質志以沒而述造闕如恐遂堙滅先生學行文章海內宗仰叔父於先生爲部民又以文字見知相從最久竊錄善行使人知勸守土之責敘次生平示其子孫故舊之誼先生皆不忍辭至於樂道人善以司馬韓歐之心爲心則又有不待請而樂爲者謹撰事狀登諸記室以備采擇先生於濤家後進口噓手植掖之以進叔父固後進奉以爲歸者也旣沒猶蒙襲寵將不獨長逝者銜感無窮凡推尊叔父而爲先生所甄錄者其孰不且感且奮冀附青雲之士而

藉以顯邪抑又有進者叔父以賑災故眾聲大和磨石紀德今得  
附大賢之書乃輿情所企望不獨貺我賀氏也其孤之感激涕零  
蓋又不足言矣

送裴叔和入都序

魁閎倣儻非常之材無異行偉節以發其氣則往往旁溢而橫決  
燕趙之際其俗懷齷而耆利仰撫俛掇孜孜耽耽寸布銖金悸魂  
怵心舉賈人婦女臧獲之業攝而身兼凡人生所有事苟損吾有  
痛絕之蓄深藏牢終其身以至其子孫不忍發能此者咸美所爲  
謂之儉勤謂之老成其聰明才俊之士屏棄經史百氏一不稽諷  
夷而角牙頓而鋸鉉筋膠準鉤輮縮鏤雕從事應科目文字以求  
合公卿翰林司當世文柄號稱宗匠者所謂程度能者謂之才爲  
而數焉謂之學挾所學責報有司謂之志士裴君叔和固所謂魁

通外稍警

無一懈句然批

初作非先生文

之盛者也

軼落多奇

其意量亦

非世俗人所

及

依龍之詞以

刻辭出之

蓋其非史遺

昌黎三家一勝

閔傲儻非常之才者也志雄氣盛抑而遏之莽然奔命曹好之所  
在若有物焉障其閒終古不能合併茫無所向乃頽然自放於聲  
色酒食酣嬉劇歡恣意所欲爲而向之儉勤老成有才志學之士  
相與排擯而非笑之其戚者則強聒以己所謂長旣激於不能返  
乃益決情潰欲若縱不繫之舟於巨壑旋轉飄蕩而不知所止也  
嗚呼吾所以惜叔和而益之以悲也叔和之父仕京朝二十年所  
交多鉅人長德其勳光文曜足以矜表後輩叔和誠棄其故而從  
之游將如離湫隘而居閭閻去傳舍而返其鄉也其處而安之雖  
有力而強莫能易一物而奪其所好又何聲色酒食之足汨其志  
哉雖然叔和旣生齟於時今又取詫聞而駢睹者挾以歸是稅載  
騷之車馬而奏樂鷄之鐘鼓也里之排擯而非笑之者不乃茲甚  
邪其然吾不復能爲叔和解矣

工於造言之

隨志霞卻  
端岩自喜進  
乎技矣

此作者早年文  
字句多於錄  
猶存錢削之  
迹字皆結  
銅錢而出以  
異鈔三氣行之  
故亦掃盡俗  
屑峻然而出  
其美

答高擲九太守書

代

讀惠書知勲績懋著志操堅定破庸陋之見行吾心之妄甚盛甚  
盛閱邸鈔知調治首郡益加欣躍某嘗以謂今之在勢者中人多  
耳鑿邪悖酷百無一二而政俗習尚乃至積廢敗壞莫可枝拄者  
何哉崇攀而熱附類引而黨招殫貲財降意愔孜孜遑遑以奔而  
上官好而僚友較俗產揣肥瘠衡出納巨取而瑣求以厚而奉而  
殖而私民環而跂事叢以待責萬萬無可辭者乃簡舊牘躡前迹  
聽顛倒措處於胥役而更無餘力及之因循偷怠相師成風凡在  
位者皆然而道府尤甚臨以督撫藩臬三四級之上官承以牧令  
丞倅數十輩之屬吏孑然孤懸於上下之間有大事不能徑達於  
天子上官壅隔遏閉則卷舌縮手而失所向親民之事責之屬吏  
唯司督察而黜升旌罰枋不我操又嚮者所取給焉故一聽其誣

蒙欺蔽熟視而不敢誰何塊居介處轉文書傳語言而已吾不解  
天旣不厭生此輩不相所宜處而必躋之顯崇又惜國家以艱絀  
之財重要之寄乃慘此暗耗罷茶不治事之官而小民出租稅赴  
徵約急上事而不自惜及有所苦而仰籲於上乃無人摩拊而亭  
決之則又其可悲者與今執事步高瞻遠於眾無措手之處獨能  
左提右挈卷舒在心志量豈不偉哉朝廷方銳意興治懷抱奇異  
者越格以升中外大臣亦能矯厲薄俗以勤廉爲天下倡執事生  
平志學適與時會胸中所有可傾倒而出此真儒生得意之事翹  
首南望稱快者再復何可言旣蒙垂詢不敢輒已屬之以猛處之  
以平變之以驟貞之以恆不矯枉而過中亦無積久而生怠所効  
忠於左右者如是而已某庸鈍自守無補於時方慙悚之不暇今  
乃舉新政以告知不見擯於君子矣用敢抒其夙憤且達欣慕之



意因勉竭謫陋爲芻蕘之獻伏惟采納

重修故城馬公祠記

代

生不出里閭無鞠育人之權而頓顛於我乎起傲悍於我乎折蹈  
德游藝我掖我匡邇昵遐跂父仰師戴沒人不忍其死則相與尸  
祝之不敢忘若其游仕四方聲烈橫被而廟食於鄉者有司以故  
事行鄉之人或未嘗濡沫偈陰蹈習轍迹則敦鉶簋俎之側裸薦  
鞠膳之頃精神意氣莫強而屬馬公仕明爲左都御史伉厲忤奄  
宦後坐事死於獄迹厥始卒固無衣被於其鄉矣人乃遠晞慕思  
作屋而垣以棲其神古之魁材峻桀其守之身而措之世與夫文  
章述造騰播於人人之口而厭乎其心歷百世而名益白者相接  
也而俎豆之報乃獨在剖誠觸戮死而不得其所之人剛直鬱堙  
之氣滯忿於人之心彌久而彌不能釋故人之致崇之雖曠時異

文甚奧  
折有力

代猶若親黨其德而濯其風也不然公之不撓於奄宦因事坐死  
自成其節耳於鄉人何與而鄉人乃獨嘉其志悲其不終祠而廁  
之忠義之列者何哉舊祠在縣城之南齧於河康熙某年移而北  
重修於乾隆某年近又百年矣桷橈階墀垣圯樹禿余過而傷之  
與教諭范君某議加修葺出私錢爲縣人倡適浙江張君某爲縣  
於此善是舉也亦以貲助旣訖功刻石記之章公偉節與始建祠  
者之意俾後進知所崇尚踵今之爲無隕神依以事以格昭乎其  
相翕淳乎其交發其陰召默毆繇是而偕逝於道將猶歛燹以眠  
墨垢而爲拾發矢者釋其獲也公諱中錫

楊剛介公家傳

公諱昌泗字廉泉湖南乾州人由武生自效於乾州營補把總屢  
禽叛獍上其功稍遷至參將賞戴花翎驍勇巴圖魯名號歷官湖

文以再獲漢陽  
爲主氣 勢局  
度皆脫胎曾  
傳

記事提要而  
文辭極屬安  
可援經史  
尤得古法

南廣東貴州疆吏才公爲爭薦於朝擢直隸大沽協副將甘肅西  
寧鎮總兵旋調廣東高州鎮咸豐二年粵賊渡洞庭而東奪沿江  
郡縣直趨金陵踞爲僞都益縱羣酋北犯時公以事視職在籍詔  
起公赴山東防河而湖廣總督張公亮基雅知公欲倚公威重以  
固楚疆馳疏留公剿游匪於黃州薙刈之幾盡搃田家鎮之賊擠  
之江賊由漢口趨武昌閉其道賊不得逞卻退磯窩者直武漢下  
游賊控以爲險與漢陽爲聲援躡其巢壘之江濱殲焉轉而西挫  
東竄之賊於塘角及鮎魚套荊州將軍官文公以監利兵薄檄公  
南循江而東蹂螺山剪蒲圻北撲嘉魚遂薄漢陽軍銳甚是時曾  
文正公督率諸軍自螺山下三路進兵以圖武漢賊分扼要險悉  
精悍以守枕江脅湖營壘星列檣旂雲布公由蝦蟆磯突入土城  
火其壁大軍水陸並進拔柵燬舟與相應和戰方殷公率敢死士

由南門梯繩入復漢陽武昌亦經大軍同時克復公之威名遂大震乘勝東討大戰蘄水逆眾潰奔南掃蘄州益進而東廣濟黃梅相繼收復公始以功復職既又被劾再奪官再復之至是授陝西延綏鎮總兵武漢既復賊失勢剗削爬搔稍復諸郡縣蕩清有日矣無幾何總督楊公需失利於廣濟羣凶益復西上武昌漢陽再陷大江南北糜沸魚爛公痛世變之靡屆而當事者非其人憂傷憤恨思有以矯厲之而巡撫胡文忠公方徵調諸路軍屯駐上游以固荆襄而謀進取公則大喜益自振拔親睦諸將訓儆士卒日夜冀大功之成時游匪四出分擾旁郡縣公往來突馳所當者靡事稍定復從大軍圍漢陽奪門先入大軍攻武昌者戰益亟遂再復兩城時咸豐六年三月也捷聞加提督銜湖北既定乃之任陝西八年詔赴河南剿辦捻匪行抵開封疾亟遂卒於軍天子震悼

贈卹如例子謚剛介曾祖正舉祖能通父光重皆贈如公官曾祖  
妣氏某祖妣氏黃妣氏姚皆贈夫人娶田氏封夫人子勝棠武生  
衡州協把總勝業乾州協把總皆歿於軍勝傑孫秀觀二品蔭生  
候補同知秀實工部主事論曰楚軍初興躡顧者數矣自湖北定  
而破九江拔安慶節次進攻無反顧憂遂克金陵王誅以成其機  
至順形勢便也公之戰烈偉矣余旣備書之於再復漢陽尤詳具  
事之本末著大功所由成區區戰勝閒豈知言者哉

湯母方太孺人六十壽序

代

女子之德風詩咏歌之春秋傳及百氏之爲書者亦閒及焉然頗  
病其略無以迹其始終劉子政作列女傳綴輯遺聞都爲一書詳  
以備矣後世史家乃或仿其例以登於史而士之名能文章者益  
復揆討善行旁及閨門於是女子之賢者乃與夫碩公魁儒閎俊

之士同傳於世元明以來有所謂壽序者人子欲壽其親則徵文於戚故朋好以爲親榮桐城方氏姚氏及曾文正公皆譏其非古而輒復效其體豈非發潛閭幽所裨於法勸者大乎鄧川湯君符階以知縣官湖北與某交最久數稱舉其母方太孺人之賢曰吾外王父及王父皆以縣令官涖吾母從而侍焉後隨吾父爲縣於鍾祥孝感今炳塋又迎養於官執儉躬劬斥疏靡華自侍外王父以迄今日數十年如一日也又曰吾父之在官也吾母始固未從回逆之亂率家人閒道走蜀以之楚還賊者再遭厲者再三年而後達於官所吾母未嘗驚而戚焉後某主講蓮池書院符階復以書抵某曰吾母之懿行旣嘗述諸子矣甲申之歲吾母壽登六十將以某月日舉觴於室子其爲侑觴之辭以慰吾親吾觀諸家所稱女子之行其道有四女道也婦道也妻道也母道也太孺人旣

盡道以事其父與舅又舉所聞於父與舅者以相夫終且以相夫者教子其於四者可謂兼之矣至若席榮不居蹈艱若夷歷之人而不更於始自修道之君子以爲難而太孺人顧能之非所謂始乎故長乎性者乎晚周諸子之書言養生盡年之術備矣而大悞不外全其天太孺人以道終始視有若亡運而不悞與古所謂養生者合由是而降釐錫祐雖馴而至乎期頤以致無疆之祿亦所蹈之道則然耳爲善獲報之說且不敢稱頌於前况世俗祝嘏之辭哉然太孺人之壽固無俟某之祝而某所幾冀於符階者則不敢不竭其愚符階以儒生爲循吏弟建侯書田並以文學吏治知名於時湯氏日以光顯矣願益以太孺人之教持其終仰而追先人勞烈異日政成治洽舉士民頌神明者奉以爲太孺人壽俾太孺人顧而樂之益以頤養天年符階兄弟之慰其親則有在矣尤

叙次真氣非  
論仙晉文正  
學韓公文字

某所私禱而期者也

叔父鐵君先生事略

先生諱錫珊姓賀氏先世自山西洪洞遷直隸之武強縣曾祖諱  
仁聲舉人祖諱雲舉進士江蘇鎮洋縣知縣妣氏李考諱式周副  
榜四川瀘州州判前妣氏常妣氏楊先生生有異稟舉作不輕同  
於人喜讀書通其大指曰學以經世也吾取其有益於世者而已  
於世儒所謂義理考據詞章之學一不屑意大師博材質以所業  
輒窮於對至論古今世運興壞之由賢不肖之別抉幽覬微剴剴  
剖攻雜以恢詭偏宕之詞雲幻波激莫測所來雖善辨者莫能窮  
也所爲文閎辨奇肆不中有司度程以諸生應鄉試連不得志乃  
益厭薄舉業并力於所謂經世之學自歷朝史記司馬氏以下編  
年之書杜馬所志典章以及國朝鉅蹟盛典皆廣涉博綜而洞其



要尤喜近世輿地之說及泰西所繪海國諸圖指次其山川關隘都會與夫輪帆出沒經行之處若歷庭闕而數階級不待參度性剛直不諧於俗旣不得志愈抑鬱不能平並世人少當意者嘗顯刺人過於稠人廣坐之中其人羞赧汗喘猶痛繩之不已於公卿貴人詆之尤甚以爲若輩恃養富貴而令時執敗壞至此咎將安歸已乃夸所負於眾眾駭怪莫敢置對則又發怒罵之曰君輩庸下非解此者吾父嘗戒之以爲非處世之道先生語人曰吾兄之言是也然吾性實然吾制之而不能克也與深澤王小泉先生以志學相高其韞深蓄富思以推致於天下也同世旣我遺不貶節以自鬻於世亦同小泉先生習程朱之說動作必依於儒先生則傲岸自喜不甚以廉謹自矜飾由是齟齬先生氣盛必欲窮之以辭旣而悔之曰其歸一也特所由之徑異耳噍噍何爲桐城吳摯

甫先生爲州於深奇先生文引爲上客與商榷古今恨相知之晚  
先生亦曰吳公知我吾不孤矣先生既抱異材偉略無所藉以澤  
斯世苟可爲於鄉里者無不爲以謂吾期於濟人而已遠近大小  
一也同治初土匪滋事先生略仿戚氏練兵之法編鄉落以守境  
賴以安光緒壬午歲大饑官給錢買穀以振先生自販糶於數百  
里外自冬徂夏往返者數矣舟車飲食費取諸私不糜官一錢廣  
立章約織曲悉當鄰境咸取以爲法經營奔走無閒寒暑晝夜億  
心疲力至輟餐寢長老嘆嗟曰自吾所聞見百年來未嘗有也未  
幾大疫人多死先生慨然復思有以拯之而先生亦竟染疫以卒  
時光緒四年六月十二日也春秋四十有二以是年十二月某日  
葬會葬者千餘人爭輓柩車道路闔塞至不得行吳王兩先生聞  
先生之卒皆慟未嘗不爲天下惜也配深澤王氏福建延建邵道

此亦少作刻  
意行卷極  
其才力所

贈光祿卿諱肇謙女先卒子泐廩生繼配張強王氏河南泌陽縣  
知縣諱堪女子湘幼女二孫男女各一兄子壽謹狀

交河李君墓表。

大司徒以六行教民鄉大夫受教灋而頒之自州長以至閭胥各  
以受於鄉大夫者教所治而當時之民之以孝弟稱者反不若衰  
世之可紀何哉司徒之灋民既月受而日習之其薰濡而浸漬以  
是爲日用之質非若創見之行詫異而歎奇之也周道衰司徒之  
灋廢孔子取其說以著於經其時卿大夫及門弟子之以孝聞者  
則亟稱之以異其異於眾於是生自具而不待索賴於外者遂爲  
至高難能之行而不敢幾之人人漢以孝弟制科其法旣美矣而  
儒者或飾所聞以應之故太史公爲萬石君傳美其仍世孝謹以  
爲齊魯諸儒莫能及夫萬石君父子貴寵文學勲烈錄錄無可紀

史家乃取其家庭慈瑣之事津津道之豈非以教壞倫敦飭庸行  
於質闇之中不自炫以獵名者少與交河李君諱元術字衡之父  
卒時弟妹皆幼兒亦遺一子以沒家故貧母撫之而憂如此寡且  
弱者何所賴而苾以生也君以爲大戚日思所以慰母者紉身及  
妻子所奉致豐其母又推母意加禮於嫂與弟妹以及兄之子其  
事自芸植蓄飼以至縫績飪饌其物自布麻米芻以至蠶篋盆盎  
君與妻雜職之而督其弟與兄子於塾壹不使有所聞以奪其志  
由是家遂饒弟妹皆適母願兄子有聲庠序間母則大慰曰  
吾死不恨矣曾祖某祖某父某娶某氏子汝棠孫懋懋簡附生  
懋勤卒於同治六年二月二十八日春秋七十有四以某年月日  
葬於某嗚乎君之才蓋可有爲於時以親故棄而弗求勤勤懇懇  
獨盡心力於聽睹不及之地以故人莫之稱匪獨不見稱於人雖

其親亦若安而忘焉夫事親而使其親安而忘也則所以事親者可知矣而人之論孝者乃棄而莫之及則人所謂孝亦可知矣人惟不知所謂孝是以真能孝者少而其能者亦泯泯而無稱也故予於李君之懿行不備述獨取其孝而推論之蓋欲使闇淡之行無以譁眾而取榮者得顯於世而傳於後也

大名書院增膏火記

自由不井授而士貧上之人猶欲取室家多累之身聚之庠序與之從容論學自非聰明敦厚之士之性乎此者則勉克我從故禮言學制詳矣而游於學者未聞仰食於官其養士之需漢以後乃有之亦勢之不得不然者與然自京師以至郡縣皆有學其隸名於學者數且十百於官吏欲於吏祿之外別籌所以養之恐竭天下之力猶不能給所須而徧酬之也宋世士大夫植養學徒創爲

前幅所論  
有同學制

文以掛珠也

書院其後增置愈多瞻學之田豐於郡縣學所以濟學校之窮法至善也今學使取充郡縣學者積至數百人廩於學官不及十一其餘無以給也籍於學既不足自存材俊進取之士乃相與講肄於書院以卒其業於是書院遂爲造士之所而爲國取才者乃不得不厝意於斯而思有以長育之矣夫名書院府所建也治於府者皆與試焉同治某年觀察祝公親校諸生於院別儲資以餉之於是執業其中并州縣所課月試於書院者三優裕夷愉志不遷奪光緒十年錢塘許公復分奉畀之以瞻與試於道者諸生旣感且奮屬濤爲刻石之文用志不忘濤爲公屬吏與聞公爲政之大者樂爲諸生道之有地數百里爲郡三爲州若縣二十有六其樂苦利病在所興革者無不問自府以下仰而承流者百餘人其人之賢不肖無不察公之來以秋其去以冬視事數月耳墮舉弛張

論子厚抑揚  
反覆富深得  
其理而盤桓  
之勢周備之  
氣又豈與之  
相副

人獲所懷其敏而有功如此公顧不自喜方且召閭里之秀佔畢之儒謀衣食茲誦之資較文藝之短長以教以養懇懇乎其未有倦焉豈非以士君子標式其鄉士習端則民俗一民俗一則德教易以施而爲政之要無踰此者乎諸生能仰體公意取所聞教於公者飭而躬訓而徒友滌革澆陋進之純美以廣公之化是則諸生之所以答公而公所責效於諸生者也

書柳子宋清傳後

子長得罪知交莫救游俠傳慨乎言之子厚傳宋清意與子長同子長之意隘矣子厚又從而甚焉於清之得遠利數數言之其意蓋曰有援我者吾之報之也豈後於德清者之報清此傳之意也不然清之遇人足以傳矣數言其得遠利則賈人之尤巧者也何足道哉古之君子其進也難其退也易雖獲譴以去而充然有以

自得也吾讀子厚與許蕭諸書蓋不能無惑焉夫子長之詞激子  
幼之詞教其於君子自得之趣已邈乎其不相及矣然彼二子者  
謫非其罪特假偏鵠激宕之辭笑訕怒詈而攄其憤耳子厚旣自  
反之不縮而又倖人之憐而收之也故其志幽抑其音哀促其氣  
亦遂凄然不能舉其辭抑猶在二子之後與雖然子厚以命世之  
才銳於見功致蹈大戾其冀得復用蓋欲直前過而竟吾才之所  
能耳夫以斥逐廢滯無人省錄之身抱壹鬱紆軫無聊之志而施  
政於遐僻瘴癘之地其所錯置已足表暴於當世使得復枋用其  
效功天下豈可量邪又烏得與奔勢竊榮苟徼貴富者等觀而類  
視之邪然卒絀於讒毀不得少伸雖生平故舊所嘗致書而希其  
扳接如蕭俛許孟容李建諸人者亦終不肯爲言此退之所謂材  
不爲世用道不行於時也嗚呼豪逸之士之不容於世也久矣庸



餽痿羸之徒席恆蹈順幸免於戾者方且日伺吾之隙而以其所  
操尺墨繩之一不自檢攝而身敗名裂終不復振者不可勝數也  
子厚之斥也惜之者退之而已李陵之敗惜之者子長而已吾著  
而論之使操用人之柄者苟遇英特非常之士當懲其躁妄而委  
曲以全之無沮遏其志而敗壞其才而士之自持其身者尤當致  
謹於出處進退之際世無退之子長則子厚乃竄斥之罪人而李  
陵乃一降虜耳雖有文學勲烈誰復稱道之哉孟堅爲李陵傳旣  
侈陳戰狀以表其功於其致敗及所以降而不反者言之絕痛而  
陵之本志復於蘇武傳言之可謂得子長之意矣陳湯奇材偉功  
以過犯屢嬰大譴閒以疾歿卒致廢死孟堅旣直書其功罪而備  
載劉向谷永耿育訟湯之疏以致其痛惜之意嗚呼此班氏所以  
爲良史與

讀墨子。

春秋時管子晏子老子之屬皆有書傳曰臧文仲既沒其言立而藝文志不載其書則有書而不傳者亦多矣孔子於此數子蓋嘗論其爲人而其書則未嘗辯也既定六經以明道矣羣言之是非猶待辯而後明邪孔子之後楊墨並稱然楊子書不傳諸子之道之者亦鮮其不足駭世愚眾也明矣墨子旣以書自見於世而傳其學者亦獨多其見於墨子書者有禽滑釐公孟子耕柱巫馬子管黔傲高石子公尙過之屬莊子書有苦獲己齒鄧陵子之屬孟子有夷之呂氏春秋有田鳩孟勝腹䟽高何縣子石又有孟勝之弟子徐弱禽滑釐之弟子索盧參許犯許犯之弟子田繁韓子有相里相夫其朋徒不可謂不盛然當其時顯功天下爲人所嘆奇而收名後世者縱橫名法之流若墨子者自太史公不能指爲何

考論古書最有

因儀高見極似

姚卽中此由學

力過人非可信

龍本也

談論頗不見

歸宿家而讀

書乃別有會心

文氣亦通古

備然迥出

於凡近

時人則其擯棄於時也久矣。莊子謂其道太賁，反天下之心，天下不堪。司馬談以爲儉而難遵，戾乎人，以爲道取信於人也難。特其徒相與誦習之耳。而孟子乃謂亂天下者楊墨也，攻剖之不遺餘力。然自孟子之後，百家多稱舉墨氏而尊其術，以配儒者。其徒之述其師學以爲書者，如我子隨巢子、胡非子之屬，漢人且具錄之。而躋之六家之內，是孟子未辯之前。墨子固不能以其術愚天下，而旣辯之後，亦未能遏其流而息其飭也。吾嘗以謂百家之說，惟名法利於用而效速，世主每甘心焉。雖禍其國而不悔。老子言清淨人便其簡也，而習之者多。君子所必辯焉。其他之以道術鳴者，雖淺深不同，皆非人情所樂，或怪迂譎變，不可考究。未聞有取其術而施之國家者。聽其自爲衰王，勿與知焉可也。何必取無所損益於世之說，攘臂其閒，斷斷焉與之角哉？孟子與莊子同時，莊子傳

雄厚堅老尚  
不及退之而竟  
境則已近似之  
矣

老子之學者也其時齊之稷下先生田駢接子環淵慎到之倫亦  
莫不本老子之意以立言漢時去古未遠先王禮教追討而復之  
非難也而當時賢君哲士或絀儒術崇黃老以清淨治民而禮教  
遂終不可復魏晉人乃至竊其迹以亂天下其禍吾道也烈於墨  
矣孟子旣貶抑楊墨以衛吾道而當時繳繞慘礫之徒以及處士  
之恣其議者無不斥而揮之而於老子莊子則未嘗辯之者何哉  
送張京卿使外國序

與中國反晝夜異寒暑縣隔大海之外而能長其眾國其土者環  
海皆有之而西北諸國最大且疆國家招懷撫內無閒海內外東  
嚮而慕挾其術業器物踔海而至者踵相接其使臣置邸闕下海  
疆萬餘里皆得築廛次以居商賈於是通好求市者數十國國家  
輒遣使報之更往互來日衍月增尤雜紛繳駟不可刮櫛義羈力

創相時進退不能以常執拘而近世士大夫好持高議扳援古昔指挾是非將相大臣爲國任事者與士大夫之議判如水火之不相謀光緒十一年六月巡大順廣道張公奉命以三品卿使米利堅祕魯日斯巴尼亞三國將行謂其屬大名縣教諭賀濤曰今茲之行期濟於事而已清議吾畏之然不敢瞻徇以誤國於子云何其贈我以言濤旣以文辭辱公之知日思有以效於公旣承命退而思曰至哉言乎天下之變莫究所終今所聞見生民所未有也海西諸疆大國以舟輿之力洞達遐阻凡土著而島居者無小大皆通之執鈞而利啗者有矣懼以威而責其貢者有矣或好始而覺終或昵此而仇彼振患釋紛而陰遂我所圖助人攻戰而實藉資要利眾所爭在彼而禍集於我我謀已久而人或我先情僞錯出事執儵變舉手厝足動有牽觸善爲國者綜眾國以參其執違

睇高矚擢摘幽隱而窮極其變幻批郤抵瑕握乎其機然後剛柔  
疾徐隨所施而無不當今之議者乃欲顓己守故執舊聞以揆量  
天下惡足禦無窮之變哉公嘗以太常寺卿總理各國事務於馭  
夷之道已洞徹其機又能不瞻徇俗議顧惜一時之名兢兢焉期  
於國事有濟公往矣遠人之安海氛之靖當於公之行卜之公以  
文章博麗稱天下使事畢當記其山川物產謠俗政制與所以御  
變之道以歸濤受其書而讀之潛討當世之務拓其志識因以益  
治其文辭稱頌公之功德則濤所效於公者有在矣

賀母齊太孺人九十三壽序

代

曾文正公論君子之澤有三曰詩書曰禮讓曰稼穡近世士大夫  
家能兼者鮮矣武強賀氏庶其近之吾家與賀氏世通姻好其人  
皆恂恂有規矩某慕而好之而與緒臣交最篤緒臣與余年輩均

爲人溫厚坦夷才高而能斂志大而不夸某特敬異之以爲能守其祖父之業而光大其門者也緒臣之祖荔生先生治家嚴肅其配齊太孺人以溫婉劑之自門以內熙熙然秩秩然先生旣沒子孫承太孺人之訓仰紹先志以耕以誦久且弗怠殆所謂君子之澤者與太孺人有子五人今獨其季存年已幾六十女及諸婦亦皆六七十孫曾男女二十餘人其長者亦四十餘矣晨夕視餐寢各率其子女以入更進環侍室不能容則退而立於庭階皆滿而太孺人精神強固耳目口體無老人之苦其視子婦孫曾之侍前猶嬰穉之在左右也所以拊順而訓戒之者猶昔人皆嘆爲門庭之祥雖其家亦未嘗不以此夸於人也光緒十一年太孺人九十三歲而緒臣舉順天鄉試族黨戚好之賀緒臣者因以爲太孺人壽將以某月日稱觴於堂緒臣以書來致其季父之命以祝壽

之文屬某某竊觀當世士大夫家奔命於仕宦之場徼圖利祿取爲親榮然不數十年而見其先後之異者多矣賀氏飭身以訓典取食於田畝其出而仕者歷久而不愆於舊蓋自高曾以來百餘年未嘗改也緒臣家較諸賀爲最貧而太孺人躬執勤劬貶損衣食男婦長幼各執所業其勉承先人之澤者亦獨勤且苦然則太孺人之膺受多祉享期頤之壽得賢子孫之報者於是乎在而君子之澤之可大可久不益有徵而可信哉某以薄宦羈於數千里外緒臣之巾屨笑語不際於耳目久矣於其舉於鄉而知其業之加進於太孺人之壽而知其家之和樂吉祥有逾曩昔爲述其世德以爲之祝以見今日之慶之有自來也

沈越生傳

沈君越生諱頌元浙之仁和人舉博學鴻詞山東按察使諱廷芳



世稱椒園先生者君高祖也曾祖世倬翰林院庶吉士祖景眺父  
敦治舉人廣西昭平縣知縣兄弟四人君次居第三伯以典史官  
陝西仲從昭平君於粵君幼育母家稍長衣食四方所至必奉母  
以行義不忍一日離其親昭平君卒於官以寇亂未得返葬君痛  
父骨之未歸也輒欲躬往求之以母老病止母沒遂悲啼就道時  
仲死已久君不知父骨所在至桂林舍於城外逆旅日出訪之潭  
而躓於途傷股途人舁還逆旅君故病咯血以母喪哀毀益尪羸  
獨身走數千里水陸頓撼衝抵寒熱憂病並侵已積憊不可支而  
新創益復痛委頓牀席廢眠食者累日昏瞢中忽自省曰所爲來  
求父骨也卽死奈何而煢煢羈旅又無一日之好以託自衡至桂  
所就與人者未歸泣命之求數日不得計無所出疾益亟瀕於死  
矣浙人之游於粵者憫君所爲移之館給其所須而代訪其父葬

叙求父骨所  
極酣恣得非  
公急境求  
論亦深至  
而得意云  
筆也

處得之桂林郭外并得仲妻柩於昭平家側竟扶兩柩以歸至家而後能杖而行仲旣沒季亦客游以死伯病羸終歲卧牀辱君率家人事之久而彌謹未幾亦卒而仲與季又皆無子君憂痛之終身君初以鹽大使候補天津棄去客游燕趙間病死於灤年四十九所主厚斂之而送其喪歸幼聘張氏女以寇亂未知存亡別娶於范而張氏來問昏期以別娶辭張女誓不他適復迎以歸無子以伯子某兼祧君喜讀性理書於姚江王氏體之尤深旁及百氏雜家靡不究討嘗慨然有用世之志苦無資地以自見於世往往發爲詩歌以鳴其鬱旣乃屏棄少壯所學獨耆老子之說窮探力索若有味乎其中者夫老子莊子之屬當濁亂之世憤己才之不見用而嫉世人羣枯於事物而不知反也乃故爲是浩茫不可控搏之詞以自適所謂有託而逃者也君讀儒者之書旣習其說而

似于國清字記

詞意安甚殊

特而文氣頗

復綿亘史之

空遠高遠非

近世所有

服行之矣而猶有耆於彼者毋亦憤憾於斯世遁而之沌閬之域  
離物而立於獨邪抑世不我知得爲者倫紀而已既畢心力於父  
母兄弟生死之際遂冥心於彼所謂清淨者優柔儼渙以終其天  
年邪然卒奔走於衣食至於窮困以死天之於賢人君子既摧挫  
其心志使不獲少伸及其窮無復之別擇一涂以自放其意亦閉  
遏之使不得遂嗚呼自古而有之矣其所以然者蓋非人所能知  
也

開州重修披雲樓記

代

衛居冀豫究三州之中抱河控濟以形勢雄四方歷周秦漢迄北  
宋恆扼此以制敵故其民好氣任俠自古著稱自河徙而南形勢  
既改風習亦殊其地爲今大名府屬之開州土故沃饒民敦愿力  
作不怠俗以富康然其地曠衍形錯於山東河南諸郡縣賓客商

賈四遠而至事厖人雜盜賊因以出入而訟獄滋益多官斯土者苟非廉敏通達之材往往不能舉其事桐城孫君蓉軒治開三年拊摩抉剔不威以嚴盜息獄簡耆穉詠歌其居之後舊有樓名披雲廢不修久矣君理而新之以其暇日與賓客宴游於此蓋將與斯民同其樂焉某聞從君游而登所謂披雲樓者據輪遠矚求大河之故瀆考歷代戰爭之迹而觀閭井民物之眾廣而綏阜也因俯仰上下思風俗之所以異於古而籌爲政之所宜嘗低徊嘆息而不能去嗚呼山川形勢之變猶能奪人之故習而潛移之況於仁政之所被有以漸靡其耳目灑練其心志而顯然予以可遵而守善哉觀君治民與民所以從君而知爲政之易也州人士旣安君之政而喜與君游也請爲記遂書之以答其請至於樓之廢興與修之之始末君自有記茲不復詳云

李起韓先生七十八壽序

同治七八年從兄允吉先生率其子及猶子讀書郡城之南濤與戚舊族黨往從游者十餘人從兄之姊夫李起韓先生以別業舍之而其子與焉先生性和易無少長戚疏一接以溫語惟恐不竭其歡主其家踰年蓋無隔三日而不見日且昏諸生輟業以息或卧或步或聚而語聞履聲自外來則先生啟扉入矣至則與吾兄說往事以爲笑樂或較諸生文藝諸生敬而愛之凡師吾兄者無不質所業於先生先生之子壽坡長我且八歲先生則弟畜我我乃師事之而友其子時桐城吳公知深州方招致文學之士聚之書院而作養之嚴其課而厚其餽其經營厝置悉屬先生州人康蔗田李簪元兩先生佐之而獻高先生阜民爲之主講諸先生皆耆年碩德繫一方之望校試之日環坐於堂觀者嘆嗟稱慕故其

時吾郡人才勃興號爲一時之盛其後濤假館四方旣而游京師  
不至書院者十餘年而吳公以憂去康先生官於五千里外李高  
皆宦游以沒吾兄初客京師旣而歸今亦卒七八年矣獨先生簡  
靜冲夷屏利卻榮棄其所官之國子監助教里居不出游神於漠  
頤性以和而吾姊閑婉而淑嫻無煩言無遽容與先生性行如宮  
羽之諧門內不聞高語疾步家人熙熙童僕訢訢固宜其席祐蹈  
祥月衍歲綿而未有艾也光緒十二年濤以大名教諭應禮部試  
遇壽坡於京師詢其父母起居且問書院之廢興壽坡具道其父  
七十八歲母七十七歲綏愉康固神明弗衰書院則先生以老辭  
其事踵其後者一躡先生故迹勿失今猶昔也歎慰者久之於是  
吾鄉之試禮部來京師者以某月日爲先生初度議合姻故朋好  
以壽先生而竝及吾姊屬濤爲祝嘏之文將歸而獻之濤惟先生

志立遠絕  
凡俗故文字  
字由心乃亦

之盛德善氣既蒸爲門內之祥而吾鄉後起之秀肩比鱗萃多取  
科甲以去亦皆濯先生之風而憩其陰也夫以一人之善施之一  
家而推之一鄉一郡使薰其德者皆相砥以幾於成其意量豈可  
限哉鄉人之相與壽之也固宜濤以職事相羈未獲躬與斯盛異  
日得閒當挾所業就正先生因拜吾姊於室祝其彊飲彊食而頌  
以難老遂徵召同人至曩昔所假之別業撫今感昔行觴賦詩歌  
詠先生之德以爲樂請先以斯文質之

### 送勞厚庵先生序

濤少不聰敏不通曉世事而嗜尙與人殊眾注聽而眈視不以際  
耳目反讎之眾棄如脫莫之知違又趨而驚之齒齟蹉盤動叢憎  
疾長益習爲於世無用之文志愈高而道愈狹兀行才處四顧而  
無所歸聞京師多博才通學乃考取國子監學正居京師冀薰濡

於師友以自廣大而所謂博才通學又聞其多在公卿貴人位卑  
力執不足以扳接久之無所遇乃改就州縣學官蓋將遁聲潛景  
甘寂寞終身以竟其學而無幾於人之我知也及來大名而桐鄉  
勞厚庵先生以同知筦河務適在郡先生與吾舅交好數見其筆  
札而竊好其文辭積思二十年而獲見於此與語輒韙之質以所  
業而不吾斥也自是每有述造輒就權是非先生亦降其齒德與  
交未二年而通永道檄先生至通欲挽而留之不得也夫以環珞  
無比佚之行治舉世莫爲之學退處辟左之地遇平生服膺積二  
十年而不獲一見旣見而遂好我之人而忽然舍我而他適則其  
皇皇懇懇冀其堅我之志宏我之見以慰後此獨學無朋之苦也  
何如哉先生還於禮於國朝徐氏秦氏所纂禮書治之尤勤以謂  
役驅萬物裁劑事變釋此而莫由其於文章則如木水之有本原



如商販之居次敘而築堂室者聳其基也每相見必以相語殷殷然若有厚望於濤授盲者以兵蒙蹙者以甲使之疾趨亟鬪而督之奏功其不能勝亦明矣雖然濤之志此有年矣自今以往擇其可入者治之采博蓄富無漫羨而不貫肌折縷治無鉤鈇以碎道其矚昧不明壅闕不通欲施其力而莫由者則仍以啟盲走蹙之權屬之先生先生勿以弃我而去而舍而不顧則幸矣

廣西布政使范公家傳

公諱梁字昂生又字楣孫姓范氏錢塘人曾祖文緯優生高宗南巡召試二等妣沈祖封舉人妣邵父爲金附生妣徐三世皆以公貴封贈如公官公家貧好學自爲諸生名已噪白舉道光乙未鄉試庚子成進士以知縣官直隸補威縣俗嗜博公禁之嚴出則進鄉民而問之婦媼環告曰鄉者夜績得布縷若夫若子持入市則

徒手歸家望哺不能得今無是矣鄰多盜竄劫恣行公躬巡徼出輒以夜嘗一夕冒風雪馳七八十里奸宄怖懾戒不擾所治尤善聽斷抉覆發隱姦黠披露有服鹽汁死者尸腐以捶死告公入室得盜具以物探其喉而親嘗之賊使其家人嘗之不肯觀者大譁乃強舐之獄遂定調雄縣升大興縣擢北路同知丁父憂京尹言於朝留筦順天糧臺軍食不缺上其功以知府記名服除留直隸候補公旣以廉察著聲至則令鞠獄訟侏張隱曲繳繞而不可端倪者壹屬之決大獄數十有誤殺者勘贖當以故公與郡守詣總督守視總督爰書將言其狀總督怒抵書於地曰是於法當死可歟法出之邪守色沮不敢置對公曰是某所讞也違覆者久之卒白其寃時總督譚公持法嚴儼佐憚之公名由此益著大吏皆倚重公攝順德保定授永平復調保定臺司有大政令必諮而後行

公益自矯厲當官直行不屈所守總督劉公屯兵於郊帳下卒掠民物民愬之公公夜詣軍門以請劉公猶豫未及答公曰某實親見微民言固將白之劉公乃誅掠民者而反其物命巡通永道而擒匪擾河南山東迫畿甸又命以大順廣道防河時僧忠親王戰沒曹州援師未集公以千百新集之師當賊衝悉力固拒以待大軍適有謀代公者謂公書生不知兵語聞朝廷知公堪軍旅命勿易公內不自安遂乞解兵柄賊旣渡河內犯諸軍旁午而至土寇四出攻剽兵與寇不可辨識民數驚公編民於兵選驍厲銳約明令堅不急與角靜鎮密防處以無事寇不敢犯而兵之過竟者亦咸守約束無擾遷山東鹽運使升山西按察使未至改直隸直隸獄訟倍他省委積叢雜紛不可理按察使受其成而已公壹親鉤治之在職九年不少懈公性精勤在官不言勞事無洪瑣劇易必

躬閱而目營之不自人手官益高則自厲愈甚故所至官治無遺闕而於治獄尤兢兢論者以爲近世刑官皆不能及再署布政使升廣西布政使叛將李揚才擾越南提督馮公出關征之時庫無侍餘而關外險遠饋餉且不繼先是軍屢興用不足則減士卒之餉公曰是苟道也財用固吾責耳蚤夜綜書條區彙覈汰冗縮盈出入無罅漏軍儲以充卒餉之如制士卒踴躍效命大憝克殲光緒七年有旨內召遂乞疾歸九年十一月卒於家年七十有六公廉於財而賙人之急如恐不及治威縣也賦入歲數萬錢徵而銀齋銀貴則以私錢益之邑人數請增其徵之數不許負累數萬未嘗加民一錢吏有旣歸而負官帑者將究之公適主其事曰廉吏也走告其鄉人之官直隸者不應則括已贖輸之官旣免卒不使其人知之也生平不問家產有亡祿糈所入以班族嫻旣歸貧猶昔

僦屋以居所衣猶作縣時物配倪氏封夫人先卒子崇威兩淮候  
補運判孫開先三品蔭生女三長適直隸候補知縣章沅次適北  
河候補同知勞乃寬次適江蘇海州學正張敦敏論曰公爲守令  
人人輒稱舉其事以方古循吏吾觀公爲司道時閱達剛毅有大  
臣體其視古所稱循吏意量遠矣公在大名時泰西人嘗一謁見  
稱道治威之政不置時去威且三十年矣而論者乃謂遠人不可  
德致抑獨何哉

孔繡山先生文集序

志我同也術我類而才我鉤也竝世而生者不過以十數焉而此  
生之不過以十數者又隔以百千萬里而不相值相值矣而所蹈  
之異其轍迹也所居之崇卑愈絕也年之先後於吾也又幾幾有  
不能合併之勢焉然吾觀學人之求友也苟竝我生之有其人雖

孔君文無可生  
終困於其所志  
遊幕服此枯  
窮題作法  
高而詞潔

其勢不可以遽合無不學媒而文贊之時政之與誦術業之與稽  
生與相問報死銘飾其終苟異於眾而能以道藝鳴蓋無不於吾  
文見之靡乎其相劇曜乎其並昭穆羽和而形景附也故讀一人  
之文可以知天下之才焉以天下之才還質之可以知其人因以  
益信其文焉曲阜孔繡山先生官京師最久其所從游若阮文達  
梅伯言朱伯韓魏默深曾文正何子貞張石洲何願船苗仙麓皆  
魁儒碩學海內所宗仰先生頡頏其閒而師友之宜其學之無不  
通而詩文之體無不備也諸公所撰述吾既博窺而竊得其指矣  
讀先生之文與詩若揖讓於諸公前而與唱酬焉執素所得於諸  
公者旁覈彙參以揣稱先生之所爲殆如舊蚤之不齟於纓五聲  
作而還爲宮也則吾鄉者之說不且於是而益徵其信哉

戴母吳太宜人八十壽序

軍興以來沿江數千里湯沸擁裂室廬灰燼民物饒耗薦紳盛族  
蕩析而無所歸旣歸而隻身赤立了無藉賴遂因以不振者不可  
勝數也吾同年友天長戴君選樓之母吳太宜人於喪亂奔徙之  
餘獨能維匡營護變不愆素久不怠初卒完其家如舊時而子孫  
日益光顯稱爲賢母豈非天下之至難者乎戴君以知縣官直隸  
待闕大名與濤言太宜人事甚詳亂作時贈君已沒而贈君之母  
尙在年已八十兄嫂皆老病子七人兄子三人多未及壯扶老挈  
幼奔避於風煙谿谷之中僅而獲免而姑及兄嫂又相繼以逝家  
故饒始散於贈君之任恤再毀於兵火又耗於家之多故至是百  
物盪盡盜無矧米篋無遺縷盡幾無所賴而庇以生矣太宜人肩  
鉅執煩拾零組匱苟有事一以自任而督諸子孫及兄公所遺三  
子使就學久之家稍裕諸子先後領鄉薦貢成均或服官以養長

孫以明經舉諸孫亦以次補博士弟子員太宜人康強愉綏有加  
曩昔人咸歎爲門庭之祥而太宜人之寢之迫蹙單憂焦思已歷  
三十年矣光緒十三年某月某日爲太宜人八十壽辰將稱慶於  
家君亦開筵客邸召賓僚以賀而以侑爵之辭諉濤濤禮辭不獲  
乃言曰世之以文稱述人者輒好稱引奇異而庸德弗章況閨門  
之中其地至隱其事至微爲聽睹所不及乎范蔚宗之傳列女率  
皆矯厲卓絕之行明辨警敏之才其循循修職自桓李而外無他  
述焉豈史家之識有不逮與亦庸行之傳於世者少也若太宜人  
之蹈艱茹苦再興其家其難蓋倍徙於范氏所錄而其所處乃不  
過家人骨肉之閒紆纓纓委之事何嘗有畸行偉節以聳人聽聞  
哉吾懼世之略而弗察推大其事而侈陳之使知臨事飭身不必  
務爲其難其至難者固在此而不在彼也君嘗攝兩縣卓卓著聲



烈名譽四馳此世俗所謂顯揚也君顧歉然不足憂危怵厲一如太宜人之居患難可謂以親之心爲心矣故余旣述太宜人之艱苦見家慶所自來因益勉君使力持其終俾子孫席其業者引於勿替若夫禱龍祺頌繁祉浮夸虛誕固太宜人所厭聞亦豈君所以慰親之意哉

王榕泉先生墓表

先生諱肇晉字捷之號榕泉深澤王氏先生之子濤姑壻也濤師之就而問學其家先生以濤爲可教數進而語之由是得窺先生之學先生研究性道以程朱氏爲宗未嘗自著書而手寫先儒之書積若干卷至老病不輟蓋朱子取禮之大學中庸及孟子所爲書以配論語爲之章句集注用詔來學士之有志於道者胥於是取則焉自功令以經義取士世之淺者暖姝自足習爲庸鄙苦窳

之文微倖於一售多聞之士病其陋也又雜撫旁稱以炫其博甚或與朱子相訾詆而蒐討隱辟而詰難之利之趨而忘其義華之掇而遺其實其無與於道一也先生慨焉搜輯儒先之說爲四書經正錄以求合朱子明道教人本旨洛閩教學誠敬爲基旣尊其說而佩習之因錄以爲服膺集旁涉諸家一以朱子爲衡意少殊則詳究而慎擇於是取薛敬軒胡敬齋張楊園陸桴亭語爲四錄前編呂新吾孫夏峯李二曲湯潛庵語爲四錄後編前編者篤守朱子者也後編者少異朱子而慎擇者也國朝諸儒傳程朱之學而得其宗者陸稼書之說最精以粹於是又別取其書爲陸子全書摘鈔嗚呼可謂勤矣先生不樂仕進由舉人選教諭棄弗就以孝以友以從政門內以竟其學與其兄琴航先生以志學相敦勉琴航先生官延建邵道時粵賊陷邵武將以身殉作書告訣家人

以不得事親爲恨先生復書勉以治軍殺賊毋以家事爲念薄嘗  
讀其書未嘗不流涕也先生雖里居不出而視當世之務如其家  
一政善未嘗不喜卽不善深嘆歎憾以憂嘗與論事曰宜爾不爾  
後恐爾歷驗如所言苟利於人倡爲之或上書當道官就諮不引  
嫌自匿曾文正公督畿輔再以書徵爲陳吏治中今日利病文正  
器之曾祖焜舉人浙江布政使司庫大使祖錫培舉人山東東平  
州知州妣氏劉父鍾和附貢妣氏何氏杜本生父鵬廩貢候選通  
判妣氏楊配劉氏先先生二十一年卒子用誥拔貢舉人候選主  
事女嫁棗強舉人步其端孫孝箴孝銘皆附生孝來孫女二曾孫  
丕祖曾孫女一先生之卒以光緒十一年八月十八日春秋七十  
某年月日葬於某學不講久矣自名爲學者奉一先生之言辟固  
陋迂而不周於用甚者或取徑於此以盜名於是講學遂爲世詬

小役耳叙次  
極有聲光

屬而華囂譎薄之士得所藉口以自放其不可極之欲其稍有知識者亦若有所辟而不敢道焉學術之日卑斯世不復得豪儒者之澤豈不以此也與先生通材偉抱推其所有未嘗不足表暴於斯世而退而斂之獨默焉以所學自程可謂不惑流俗而篤於信道者矣先生世爲望族自其先固多儒者有著述行於世先生續家學禮之子孫吾師繼之益博以邃而孝銘年甫冠尤雅亮有遠志君子之澤之久且益昌其道固如是也吾師以先生事狀授壽命爲刻石之文因揭其爲學大指使有志於學畏流俗之譏而輒止者可以自決所從豈特慰吾師之孝思而勉其孫曾也哉

書大名國太守事。

南樂姦民楊荷豪橫鄉里酒博無賴之徒無近遠皆能役驅之觸文罔者數矣與里中富人王欽相仇謀劫質欽欽挈其家逃荷率

眾至欽家抵牾器物而捆載其資糧以去時荷之眾已四五百人矣眾既聚不能散遂蓄逆謀製旗幟火器戈鋌之屬甚備是時海疆不靖鎮大名總兵統所部遠出防海而兵備使者沒繼者未來眾兇懼知大名府滿洲國鈞公率數百人以往至則屏騎從出教條曉其眾竦以順逆禍福而召其鄉鄰說荷使到官三日竟致荷於獄卒以無事時光緒十年六月也公之出僚佐士民送之南門退相告語多爲公危及歸而迎之則又驩怵蹈舞交賀公去無遺色歸無矜容坦坦如平時於是皆歎公之知略足以御變而其量尤不可及云自守土之吏不能詰盜而姦宄潛構往往蹈瑕橫發而不可遏禦若廣西之髮逆蹕輓東南皖豫之捻匪出沒於燕齊秦晉其始則亦衰民溷迹市閭誑丐頑魯誘結姦猾耳郡縣督吏役捕之足矣故當其未發更役捕之而有餘及其勢之旣成窮天

前編卷四  
百零九年

下之力歷十數年之久僅乃克之論者謂擇良將帥不若擇良守令不信然與時濤甫至大名親觀其事懼其事之久而湮也於其將去也追記之

李亞之先生墓表

先生諱希聖亞之其字也東鹿李氏家故饒先生修其業而益息之躬督耕作而僦傭行賈徧四方積三十年家遂不訾性儉約節縮於身以及其家而斥奇羨以周匱貧無所惜歲大饑廣濬溝渠治園亭場圃取其庸得全活者數百千家嘗欲置義塾課族人士弟而捐田以贍之規畫粗具矣而先生遽卒春秋四十有七以孫貴贈奉政大夫嘗獨以謂富室者一方所仰賴者也名田數萬畝財幣流衍旬其貲以轉販者絡屬於道手銚鋌而刈穫其畝者比屋而環居操櫛柯度規縣鎔金運膊諸食藝術之人廩其家者相

先生之時均富共

其子說尚小大者

而已逆反其禍

之將萌而思所以

拯之此篇乃履

主序墓表發

明古者係富而

義以端時論之偏

皆卓然有周

世遠之文也

踵也而溝防築構之所宜興置水旱癘疫之災之所宜振救歲時  
昏喪之所宜問遺凡事之待財而集者又皆有以塞眾人之求周  
官以保息六養萬民其一曰安富解之者曰平其繇役不專取豈  
非以富者人所附有無通易聽其自爲而我無與焉茲所以爲養  
歟自富人私其蓄靳而不施乃迫抑而彊取之此非獨在上者之  
過也若先生之所爲非臨民之官所急欲安之以助我爲政而爲  
斯世所甚賴者哉祖某父某配某氏子全有全仁全智全福孫汝  
舟廩生汝梅舉人汝楫附生候選郎中汝春廩生汝桐汝濱汝弼  
汝橋汝成先生之卒以道光某年月其葬以某年月撮其行義而  
表之則光緒十三年八月也

李君恕堂墓表

李君諱全仁父希聖贈奉政大夫濤旣表其墓而次其世系矣君

年十六喪父兄弟舉家事屬之君君惕惕孜孜恐隕先人所貽承兄弟羞業益冒自守益約推施益眾邑故多富人君家尤爲眾望所歸雖他富人亦爭效君所爲皆自以爲莫及君年三十二而卒實惟咸豐四年距今三十餘年矣鄉人猶稱說之不置奉政君既勤一世以治生悔不學嘗誡諸子曰家幸饒不憂衣食惟讀書知道理能世吾業而大吾宗酣懽於富厚而能久非所聞也君幼稟父訓讀書無惰志旣主家不復以所學干有司而爲之益勤賓禮文士如恐不及子姓以其故多向文學君卒後數十年中以文學見錄於有司者閒歲而有迄於今不絕吾從兄子言先生主講東鹿書院李氏子弟多及門其人皆通雅而抑浮祛悛如其先志吾兄亟稱之介吾兄以書走大名屬滯表奉政君之墓已又次君之事狀以請曰匪獨吾家繫鄉人之志因述其仍世懿行揭諸阡豈



唯身受者之不忘將以詔於無窮君配王氏奉政碑所謂附生候  
選郎中汝楫君之子也孫某某

題大橋遺照

通州范君肯堂不忍死其妻圖其母家所居曰大橋遺照大橋者  
所居之里有橋而其妻取以爲名者也圖成繫以詩以視武強賀  
濤曰子其爲我識之濤不知死生之說古之達者如莊周之倫以  
死爲寢休而無概於心佛之徒則謂人死且復生相與禮於其所  
謂佛而致死者於佛所謂極樂土而生之夫不死其死與死而之  
生皆致絕於其死而推而遠之不足以抑人之情而塞其悲方士  
能致鬼與人相見其說蓋誕怪不可信然古有復魂之禮宋玉景  
差祖其意衍爲招魂大招皆懇懇乎以故居爲念而庶幾乎魂之  
歸來范君旣圖大橋所居又冶銅爲鑪薰以眾芳而勒銘其上以

招大橋之魂然則斯圖之作其楚騷之遺乎

### 周孺人傳

候補巡檢山陰戴君元選矩卿喪其配周孺人哀溢於禮諸友謀所以解之者君曰使亡妻性行得見於松坡之文吾無恨矣濤重拂其意乃爲之傳曰孺人某縣人父某母沈同產八人而女兄弟三人父早卒伯兄客燕趙佐府縣幕所至奉母以行舉家從之戴君故宦游旣娶遂依周氏周氏家約男女長幼各職所業莫自逸暇孺人旣居母家與兄弟妻雜作不稍自異家人亦安之無彼此言孺人兄客大名濤始獲與戴君交因徧交周氏兄弟數宴其家十餘人食立具茗饌精善尊簋絜脩皆孺人所手治也孺人二十六而嫁踰年而喪姑孺自傷悼曰人生事親重耳旣未及侍吾姑當益致謹吾母又七年年三十四而母卒母卒數月孺人亦以

疾卒孺人體故羸其疾也以憂母疾母亡而疾益劇其沒也則又以母匱之將歸也孺人於女兄弟爲季旣亡其兩女兒母益憐之孺人亦能仰體母志動輒適指三十餘年未嘗一日離旣沒竟附母匱南旋葬先姑墓側臨終戴君撫視之曰子年尙壯幸可差孺人泣曰不起矣我年五十餘矣何壯也語訖而卒孺人蓋嘗禱母疾願促己年以壽母也無子一女殤古者女子在室事父母之節與男子同而其衣服觀祭祀凡婦人所宜有事皆及女時而知故葛覃使治絺綌斯干與議酒食而采蘋美大夫妻說者乃以爲能循爲女時法度近世士大夫家不復責女以職業嫁而歸則益惰以驕盛族巨室其習尤甚以吾所聞孺人之行殆無愧於禮教而爲世俗之所難矣然自孺人視之旣嫁而未嘗一至夫家又無子女輒以爲無補戴氏雖克盡女職且卒以事母以賢孝稱母家其

作者平生不為  
為駭賦有韻  
王文以病目故  
選韵皆詞每  
不使也此玩各  
作而其現聲  
跌蕩如此  
峻厲欲出欲  
去古初

憾且無窮矣而戴君之所悲者不更有在乎

祭王次陶文。

材則自晦豈為仕謀不戚於窮匪財之求胡不家食卒死於游有  
友仕滇曰子我助君奮袂起戚君者懼尼毋使行君曰無恐曩游  
吳越西北秦隴東徐兗青勝無不控屏舟與車炎歊東松攀危躅  
巘手戰足趄形則窘囚而適寐膠滇辟西南引黔控交山川重襲  
紆譙鬱橈自中原往吁哉其遶道豫越荆驅山走濤我足未騁我  
心則忉既至二載馳書抵我文詩百篇記所經過瑰思偉辭鉅不  
遺瑣物萬億貌窮其醜矯嗅彼世味唾猶掘堞云歲在亥我將北  
首度我抵里月直子丑不謂及期君歸以匱往二十載偕薦於鄉  
初與君識鏤腑結腸志蕩辭軼陵籍傲康我則其閒天駟跛狎不  
闊而媾千詩百觴自君行遠我卧如僵君歸有期冀以日夜道出

沅湘胡稅不駕南衡北江千里之野古有騷客楚屈漢賈呼索作  
述更悲互囑將反故居抑留不舍望君不見遙祭奠聲

書商君傳後

前乎秦治祖唐虞漢迄今祖秦唐虞之後涉夏殷周三代暴君令  
辟更作蠹壤革興相乘除於千數百年之久而不能不蹈循其軌  
迹周季世變唐虞之法窮商君知唐虞之法不足攝天下也而易  
唐虞以秦春秋迄漢患害紛沓四百年無寧歲秦法興始皇并天  
下漢承其故而天下遂安涉魏晉以來十餘代暴君令辟更作蠹  
壤革興相乘除於千數百年之久而不能不蹈循其軌迹秦之視  
唐虞則有閒矣然襲其法而安循之輒敗範天下後世使莫能越  
踰固無異乎唐虞也然而唐虞之法羣聖人編諸簡冊尊之爲經  
儒者抱其遺文踵前祖後見秦所措建戾我所聞遂相與排擯之

作序於萬壽寺

閣得未曾有

而實扶古今制治

更法之原先生

集中諸極之

作世運突飛

猛進至今已

拙前古所未嘗

有立乎其際能

逆觀未來之變

而有以導而論

之惟先生之論爲

然

劉健得此爲似

退之亦以此爲

以爲不足道於是唐虞之法屏棄於世而誦習之不衰其爲世所  
遵守亙百千年而享其利者則以其秦也而叢詬厲夫天下之變  
莫知所屆雖聖者不能預防事起法從甚者必盡易其故侵奪之  
禍古而有之至周之季而其禍亟此不得不變者也四夷之禍古  
而有之至今日而其禍亟亦不得不變者也秦變之以取詬則古  
今之見蔽之今變起而圖所以御之稍試新法未嘗舉故法而更  
之也而議者已譙起則中外之見蔽之也無古今無中外相時所  
宜而取決於己忍天下萬世之詬而不辟者然後可與論治  
武彊蔡君墓表。

武彊蔡君寶桂以行義稱於鄉旣沒鄉人謀不朽君以事狀請於  
縣與學縣與學撰次君行義歸諸鄉人俾碣於墓族人曰鄉人且  
爾吾其可後於是彊君事狀及縣與學所撰次俾君子勲持以視

與衍物折作

者古理之文每近

于因此州無取介

甫識焉而文潔

韓公生平與人  
書論文章 賢  
先極精微此文  
亦步趨成範

濤濤曰古者於喪禮至詳其儀品器式今固不可得而見經衰杖  
帶之制雖未嘗大戾於古而各徂所習里異而家不同其沿自古  
而統天下無異同者獨喪期爲然然止以應律令耳其飲食居處  
與凡喪所宜禁而不得爲者猶自恣也蔡君居親喪毀幾滅性服  
除而未復以至於老如親始喪然嗚乎蔡君所爲亦自順其性耳  
而人之見之者乃皆感歎而稱美知古禮雖不行於今而禮之蘊  
蓄於人心者固未嘗亡也苟人心之不亡雖久衰莫振之俗不難  
愧厲而匡挽之而禮之節飭於外者又何難以漸復哉世謂古禮  
不可復皆苟於自恕者也余旣嘉蔡君之能喪其親而歎人之苟  
於自恕因發斯議以表于蔡氏之阡其世系卒葬與所施惠於鄉  
者具見前碑不更列云

答宗端甫書

而所聞於元深

探和與暢而言

之足以洋達後

進

於聲

道實已大

徹大悟故言

之左右達源

假橫如是志

若是昔曾文

正許拙卷答

劉生書請

謂此文乃參

透真消息

姚氏可作周

官相視而笑

莫逆於心今

此文亦所謂

參透真消

息也

奇

文

三

辱書以文事相質以謂多讀書曉世務則理富理富則文有質幹而義法自從不必斤斤以學文爲事子之言誠當矣雖名能文者不能外子所言矣雖然以濤所聞文之能事猶有未盡乎此者齟齬蹙齟曲脊跛足枝於指而癭於項固不良於用不美於觀矣官體肢骸不失其形所以辨臭味聲色而任提挈戴負者舉有所職以呈其材則凡名爲人者皆然也然而閎隘亢爽魁猥舒急都鄙之相去而相反倍蓰十百乃至不可計數泄於面顏不能自閉遏卒然遇之而能辨者則精神意象之爲也執子之說以爲文誠具其形且可適於用矣而文之是非高下猶未定也舌之論文者以氣爲主桐城姚氏創爲因聲求氣之說曾文正論爲文以聲調爲本吾師張吳兩先生亦主其說以教人而張先生與吳先生論文書乃益發明之聲者文之精神而氣載之以出者也氣載聲以出



聲亦道氣以行聲不中其竅則無以理吾氣氣不理則吾之意與義不適而情之侈斂詞之張縮皆違所宜而不能舉然有當於人之心質幹義法可力索而具也聲不能強揆而得也冶金以爲鐘斷桐以爲琴截竹以爲管依古譜而奏之伶人樂工蓋可學而能矣至於感陰陽動萬物而辨治理之盛衰則伶倫夔曠之外蓋無幾人以其神解妙會無法之可傳不能據成迹以求之也後之學者將取合乎古必取古人之文長吟反覆而會其節奏其徐有得也含而咀之毋操毋忘薰炙浸灌而漸而進焉以契乎其微而幾於自然然後吾之氣與古人之氣相翕合而吾之文乃隨其意之所嚮措焉而皆得其安此之不能羅列纂排章摹而句仿之其精神意象豈有合哉子且謂多讀書曉世務不求文而文自工何其言之易乎三代之後文莫盛西漢而韓退之所稱道者司馬遷相

如劉向楊雄而已賈生之洞澈今古量錯之綜覈事物董仲舒匡衡劉歆之通明經術其才學蓋不下數子其文亦且非後世所敢望而退之獨未嘗道焉亦卒不能與數子並其離合深淺出入之故當有別之於微者而顧可易視之乎予嘗有志於斯世欲樹功名以自見以子之學行子之志其庶幾矣若舍其所志降心而學文則請無易視茲事而忽鄙人之所言

書韓退之答劉秀才論史書後：

張籍勸退之爲書排釋老劉秀才勸之作史退之皆推而卻之其心期殆他有所屬答書云云特詭遁其詞非其實也答孟簡書云使其道由愈而粗傳雖滅死萬萬無恨何恤身之有抗疏觸天子之怒譴死不顧而畏嚙嚙之口乎上李巽書所謂舊文一卷扶樹道教當指原道諸篇時永貞元年退之年三十八不待五十六十

誠量絕高亦

自見分際

於古之大家傑

著書傳後之

百寶能深契

其微故樹義

搞詞皆高

峻出於流俗

能傳韓公心

事亦符韓公

以自況者亦

而所以排釋老者固已有成書矣順宗實錄於當時權倖小人罪狀直書無所憚何云畏禍乎且其初志固非無意於史也求國家之逸事攷賢人哲士之終始作唐之一經嘗與崔立之言之矣今何自謝不能書中所論列柳子厚駁之甚悉而答書不傳然觀子厚致段太尉逸事書乃自引咎知又設他辭以脫之矣古之作者皆自闢區宇蹊然而特立不相師放而後乎我者胥於是取則焉便退之爲史則司馬子長而已爲書距異端則孟子而已二子者固退之所亟稱而宗奉之者也然遽蹈循途軌而爲其所爲猶不甘也漢魏以來名能文者彙所雜著爲一編名曰文集循俗應世之文耳退之獨約羣經子史之義法而爲之其標類也不易其故而辭體則由我造焉而古文之名以稱故六經之外爲編年之史者本左氏爲志傳之史者本司馬子長指事揭義傍問設辭意盡

仙苑

語止不標體格本孔孟門人所記述不隸於事不離於人不殽於  
數度探根搆空以論道本老子辭賦本屈原而古文則本退之退  
之之文出凡從事於此者舉不能外所爲而別啟涂徑而其文遂  
與左馬孟屈諸家竝峙於天地此退之所以敖倪古今獨抱偉志  
而不肯告人者也古之治術業者淵源漸被率資力於師友至於  
心所獨期意量之殊邈曠古今而獨立之概雖師友不必與吾事  
焉以張籍柳子厚相知之深相期勉之厚猶詭辭以應之不肯使  
知吾意況下此者乎後之學者稍有得於古而志識曾未堅定輒  
亟暴而夸示之其終於無所成就也又何怪也與

送范肯堂序

濤始學文於桐城吳先生及武昌張先生北來復命往受法時吳  
先生爲翼州而張先生弟子通州范君肯堂以聘來濤亦自大名

情動筆端  
寄書千里  
雖在遠外可  
謂不食人間  
煙草矣

教諭調守冀學因主其書院講席始與范君交蓋通之爲州江海  
所匯形勝冠東南君生長其閒恣山水之好又遠客四方以博其  
趣故其文恢譎怪瑋不可測量濤旣腐於才獨妹妹焉抱師所傳  
而足迹所極并四達而不踰千里輒用自憾而壯君之所爲君亦  
以是相勸七月初吉君將南旋次其道所由自津沽浮海南至滬  
又竝海而北絕江而抵通旣拜其親應試於金陵迎婦於江右聞  
張先生且南歸則又溯江而上謁師於武昌不半載走江海萬里  
凡吳楚勝地古人所窮探極賞更百千年而號爲名蹟者一縱所  
欲游以盛昌其文濤旣不能勉從君言則惟冀君之速歸讀其文  
訊所經涉以馘聽覩而恢拓志量斯不啻從君游焉君與南中故  
舊選奇逐勝徜徉而酣嬉思北方友人有滯迹辟左形拘景繫如  
君詩所謂蠶坐而釜游者亦未必不笑且憐之而亟圖北來以慰

其意也

讀柳子厚集

子厚得名早應世文少時獨多於退之貶後自云文與前編獻文諸貴人而行亦益修乃終無所遇以復其故退之數以文謁公卿而氣傲而言峻與者少後名益白位稍顯矣猶時觸讒忌以顛蹶其不遇與子厚同而其憧憧皇皇思致已所有於人而希亟就功過而思伸久且愈篤一人之志亦未嘗不同也子厚爲伊尹就桀贊論者謂飾詞解詬吾以爲其素志乃爾雖退之亦然古之賢人志士心乎斯世不忍矜飾以廉謹而自衮其無用之軀者蓋無不然也後世儒者以是爲韓柳罪不已過乎孔子弟子仕私門仕亂邦未必悉與義準而孔子莫之禁焉衰漢多隱士辟不就者乃至數十百人豈衰漢人才盛於孔門而郭李所漸被賢於仲尼邪是

詞氣古雅

文氣到夫願  
於和適二空  
然其用意所  
謂剛健含  
如言若是今  
日已遠也

不得以迹論也歐陽公云人當議事時若知義者及到貶所則怨  
嗟不堪雖韓公不免吾意不然潮州謝表情迫而辭切眞所謂惓  
惓不忘君者故天子見之以爲愛我與夫圖寵冒進旣黜則戚戚  
以憤憾蹈隙而希復用者則有辨矣子厚與故人書詞旨亦略同  
惟賦騷及諸雜說詞多激望益深尤取世譏吾嘗反復其文而深  
思之怨矣有悔心焉讀其書者固當哀其志而嘉與之況國風小  
雅屈子之作其怨嫉皆不減子厚所爲惜才之不見用而不能起  
吾君民憂思憤懣形諸文章才志忠懇之士之所同也又烏取夫  
中無所有退託淡泊而以矯爲高者哉吳先生論韓柳多恕詞因  
推其意書於集後以質世之讀韓柳集者

送張先生序

經詞質詩獨爛然而華楚人旣侈其體以爲賦而賈誼司馬相如

語皆心得故能立  
言不抄學術真  
偽之分在此文字  
質健似韓公其  
立言尤為和介

脫知最得古法

枚乘楊雄班固張衡之倫用以薦功諷時抒懷懷狀物變益瑰放  
詭怪而不可窮承效者多沿用爲體其弊也厯蕪而纖僞唐韓愈  
氏急起而持之汰繁抑浮一歸於樸羣天下學者惟韓之從自漢  
迄唐曠數百年而文章始復於古習傳之既久或孤抱韓氏之義  
法而不敢他有所涉其弊也意固而言俚國朝姚姬傳氏纂錄古  
文益以楚辭漢賦其說旣美矣曾文正公取其說而益恢之以自  
治其文而宋後數百年沿用之體於是始變漢文偉麗矣而所謂  
質者固在也末流汙焉耳韓文簡樸矣而漢文氣體固在也末流  
靡焉耳韓氏振漢氏之末流反之古曾公振韓氏之末流反之漢  
先生師曾公嘗取姚氏所纂錄而獨說其辭賦以示學者濤旣蒙  
不棄以爲可與於茲事而數進以閎肆之竟夫閎肆之竟舍先生  
所說固莫由達也而孰思之而莫窺其涯於先生之歸也敬以問



之

送吳先生序。

意有所寄而爲文而意之所寄恆視其所遭之時與所處之竟以盛德當末世而易以興詩之刺譏大氏因所遭際託諷詠以達其所懷春秋繼詩而作其意蓋與詩同故孟子尙友古人必論其世以知其人而不泥乎詩書之迹於詩曰不以文害辭不以辭害志於書曰盡信書不如無書不信者不信其辭也諸子之書荀卿以爲持之有故而太史公於古之作者必推其作之之由其采之以爲史則曰好學深思心知其意曾文正公云太史公稱莊子多寓言吾觀子長所爲史記寓言亦居十之六七古人讀書及其所自爲書其情趣類如此韓退之非三代兩漢之書不敢觀其取法三代兩漢也亦曰師其意不師其辭故後之作者惟退之爲近古

先生新道之文

此篇尤爲卓傑

其氣亦磅礴

而充沛

陳義既高又

不岐居惟當

者百然也身

近世之學者不然爲理學之說者曰某書體具而未極其至某書務末而遺本某書不合仲尼起作者而面詰之不能自解免也然而作者之意彼固未之知也爲考據之說者曰某文非古之訓某名古無此稱以事徵多抵牾以時考失先後起作者而面詰之不能自解免也然而作者之意彼固未之知也爲辭章之說者曰事覈而辭簡三代之文也體大而氣充西漢之文也意繁而語偶東漢以後之文也時代之論古而有之沿襲以爲說耳作者之意彼固未之知也夫不能心知其意義拘詞泥而馳逐於膚末自詡知言無異乎言理日益精考古日益詳文之義法益嚴以密而名能文者且閱十百年而不一遇也濤嘗聞桐城吳先生之言矣曰古人著書未有無所爲而漫言道理者由先生之言思之自易以下皆有爲而作者也自韓以上皆讀其書而知其所爲者也先生以

請此使我汗  
流浹背

此意求之古人之書其幽懷微旨曠數千載無人知者至是若出以相示而書之正偽淺深離合亦遂就我衡鑑莫得逃其形向所謂三家學者既因先生之說奪其依據執不得不逡巡辟易而不復能執舊所操術參與乎作者之列其接討廓清之力如此用其接討廓清之力以自治其文而其文乃與退之前二千餘歲之作者相揖讓而孤行於退之後至今千餘歲之中而邈無儔焉先生官冀州命濤主其書院講席朝夕請業方聞其所可得聞而先生去官將都講蓮池書院皇然如失所依歸乃聚諸徒友撮錄先生所平議於諸書者且竭吾才而鑽仰焉先生儻矜其用心之勤異時趨謁坐之諸生之末口授其傳悵或者得聞其不可得聞者乎此固濤所不能驟幾而又不能不汲汲而求者也

題畢芾亭先生小像

深澤畢芾亭先生耆年碩德游宦京師鄉人之在都者皆樂從之  
游濤從祖叔父與先生鄉試同年吾家後進尤宗仰之稽德考業  
諏事所宜惟先生言是從先生喜讀性理書自檢甚嚴久宦如寒  
素嘗繪小像題其後有自識爲我之言其乞贈言小引有曰二三  
契友皆知其爲予嗚呼馳驚仕宦之場失其爲我而不自識者皆  
是也匪獨不自識易其性行以歸雖家人戚黨且將不識之矣觀  
先生之言益知先生所學濤初學爲吏俶倂無所從先生其有以  
詔我乎爲之贊曰述先生之德吾莫測其學所得也頌先生之壽  
非先生所以不朽也歟歟其身嘻嘻其神京師所貴奔騁而遨放  
而厠其閒者有儒者一人以所自贊贊之庶可得其真矣浮詖迂  
誕之說匪陋則枝惡足爲先生陳哉

定州王文泉先生行狀

曾祖又曾誥封朝議大夫晉贈通奉大夫

祖萬年乾隆戊子舉人誥封中憲大夫晉贈通奉大夫

父寶華嘉慶丁卯舉人誥封奉政大夫晉贈通奉大夫

先生諱灝字文泉姓王氏先世自山西洪洞遷直隸定州之奇連村十傳至先生之高祖徙居州西門外先生長身魁貌性坦直善與人交所過逢雖卑幼若不同道益自下飲食笑呼連日夜不厭既猶追述之以爲樂人有過顯斥之使不自容卽有求輒逾所望喜讀書務爲經世之學期有濟斯世視人事如己苟利鄉里無不爲事以財集倡爲之或獨任州有大功役必仰以成振乏困不待請歲歉出米平市價而量畝授種以爲常光緒初歲比旱赤地數千里飢民走死徧野益思所以全活之遺者給米而二十里內設施粥之所三百十月至正月就食者日五千人而留其老弱婦女

詳贈通奉

後賜爲榮書

刻書雪松齋

同進

之無歸者數百人至五月竟事未嘗死一人使人持錢四出要孔道資飢民走四方者獲資免道路死二千三百餘人又出粟四千石建倉儲之歸之官鄉人感德遠近信賴自粵賊竄畿甸其後土匪竊發連年不定繼以捻匪畿內不靖者幾二十年州縣治團練率不能成軍賊至輒潰先生旣爲一方所信仗悉就法約又出家財助之人益奮厲樂爲用以戰以守竟賴以完粵賊之竄入臨洛關由正定趨東北過賊於藁城之濠莊鎮賊遂東土匪犯州竟與戰輒敗之最後賊至高門鎮而官軍躡其後往說其將而夜帥數十人卒往掩捕斃數百人眾潰土匪遂平捻匪北渡晝夜城守而時出擊之衣食難民而令其壯者登陴賊游騎數至卒以有備不敢犯總督訥爾經額公劉公長佑皆奇公所爲予以軍械而犒勞其士卒先生旣以贊雄一方嗇於自奉於人世華靡無所嗜獨喜

收積書籍所無必求之不校直以異書至酬之輒過當聞有善本使人齎重金不遠千里必得然後已濤嘗游京師書肆所指求輒曰昨新得已送定州王先生所如是者數矣自宋元明初精刊武英殿諸刻國朝諸巨儒所校古書兵燹後絕難得者皆有之而人世通行之書殆無不備羣經注疏以及箋解考證凡涉於經者六百五十七種而小學音韻之類又百三十五種歷朝史記與譜錄志傳凡隸於史者以及各行省通志府州縣志五百十四種諸子術數方伎之書七百十三種漢魏以來詩文集六百二十七種纂諸家詩文爲一書百四十八種叢書百十種其子目七千六十四類書三十三種善本重收又二百七種寫本百二十種以帙數都六千五百三十四以四庫例著錄而編校姓名刊刻年月皆注之其爲四庫所未收而通儒博學不嘗見者蓋若干種善本以錦爲

帙其尤者襲以篋笥置祕室餘則叢插架上堂室皆滿又以餘力  
搜輯金石拓本千餘種嘗以謂大河前橫太行右峙度漳衛而東  
薄海其地平舒壯闊荀卿董仲舒後作者代興汴宋以來爲帝者  
都人文乃益盛而不幸而其書不顯於世者乃至不可勝數此命  
世君子以斯文自任而生長其地者所宜悼懼者也於是有畿輔  
叢書之刻廣延英俊齎金幣走書四方罔散失拾闕殘巨細畢收  
日積月增遂以大備於周得一種於漢得四種於魏得六種於晉  
於齊於隋得一種於唐得十六種於宋得十五種於遼得一種於  
金得五種於元得八種於明得七十八種於國朝得三百四十六  
種甄錄芟補匯爲一編其零篇碎牘不能成書者更爲畿輔文徵  
附其後與校勘者皆一時博通之士而書之棄取與纂修體例雕  
刊規式則先生自任之始設局於保定旣移於家日從事編校孜



孜無倦容雖疾病不輟歷十年將藏事矣而先生遽卒然雕印成書爲先生所目覩已過半矣先生旣耆學喜賓接文士自開局校書學益勤名公鉅卿博材碩學爭欲與交交道亦日廣而所學益宏博無涯涘合肥李相國以畿南文獻榜其門而畿南學者亦遂仰如山斗云先生之卒以光緒十四年八月六日年六十有六由舉人議敘同知賞四品頂戴配許氏同郡舉人魁烈女先卒繼配何氏正定廩貢生秉鈞女子延綸優貢亦耆學刊書之役將續先生之志而成之也女適行唐中書科中書李鹿鳴孫思範娶吾叔父諱錫珊公次女先生見濤文以爲奇招與校書濤亦欲一謁先生縱觀其所藏書以爲快而卒不克此濤之私憾也先生平生志事武昌張先生旣表其墓矣茲復爲之狀仍冀立言君子撰次其事以廣其傳